

PELAJAR 7

PENGANGKAT ARI MATI

Sepengudah Jesus mati ba atas kayu regang, Iya lalu dikobur sepengelama tiga hari (Mat. 12:40). Udah nya Tuhan ngangkat ka Iya ari pemat. (Baca ba Mat. 28).

“Pasal Iya ti datai ari Allah Taala; pengidup Iya ti tuchi, nya dipadah enggau kuasa ti besai Iya nya endang amat Anak Allah Taala, ulih Iya di-angkat ka ari mati pulai idup baru” (Rm 1:4).

A. TUHAN NGANGKATKA KITAI BEGULAI ENGGAU KRISTUS

Pemati enggau pengangkat Jesus ari mati ungkup semua orang ti arap!

“Dulu menya kita mati ba semangat, laban kita enda ngasi lalu bedosa. Lebu nya kita nitih ka jalai penyai dunya tu, kita ngasi ka pemerintah ti megai kuasa di dunya luar, iya nya antu ti bekuasa ba sida ti enda ngasi ka Allah Taala diatu. Dulu kitai udah baka sida, lalu diau nunda ka gaya pengidup mensia ti bedosa ari asal, sereta nunda ka pengingin tubuh enggau runding kitai empu. Baka genap iko orang bukai, kitai mega endang patut nat ka ukum Allah Taala.”

“ Tang pengasih Allah Taala endang belimpah-limpah, lalu pengerindu Iya ka kitai endang besai, keba lebu kitai mati semangat ketegal dosa, Iya meri pengidup baru ka kitai ulih Kristus. Ulih pengasih Allah Taala kita udah di-idup ka baru. Ulih penyerakup kitai enggau Jesus Kristus, Iya ngangkat ka kitai enggau Iya, lalu kitai endang merintah enggau Iya di serega” (Epe. 2:1-6), peda mega ba Kolosi 3:1-3.

1. Awakka Meri Pengidup Baru Ngagai Kitai

“Iya udah ngelepaska kitai lalu ngangau ka kitai nyadi ka anembiak Iya empu, ukai tegal pengawa ti udah digaga kitai, tang tegal nya ti dikedeka Iya enggau laban pengasih Iya.”

“Iya udah meri ka kitai pengasih tu ulih Jesus Kristus apin dunya nyadi, tang diatu Iya udah di-ayan ka ngagai kitai ari penatai Pengelepas kitai, Jesus Kristus. Iya udah madam ka kuasa pemat, lalu ngena Berita Manah Iya udah ngayan ka pengidup ti meruan” (2 Tim. 1:9,10).

2. Awakka Kitai Ulih Di-Ada Ka Baru

“Awak ka kitai meri terima kasih ngagai Allah Taala ti Apai Tuhan kitai Jesus Kristus! Laban penyinu Iya ti besai Iya ngada ka kitai baru, ulih pengangkat Jesus Kristus ari pemat ngagai pengidup ti penuh pengadang ti meruan” (1 Pet. 1:3).

3. Awakka Meri Pengidup Ti Baru Ngagai kitai

“Lebu barang orang besaum enggau Kristus, iya nya orang ti baru; iya ti lama nadai agi, iya ti baru udah datai” (2 Kor. 5:17).

4. Awakka Meri Ngagai Kitai:

a. Pemenang Ngelaban Sitan

“Tang kita, anak aku, endang enggi Allah Taala, lalu udah ngalah ka sida nabi ti bula, laban iya ti dalam kita lebih agi bekuasa ari iya ti dalam sida enggi dunya tu [Sitan]. Laban genap

iko anak Allah Taala ulih ngalah ka dunya. Lalu kitai menang ngelaban dunya ulih pengarap kitai. Sapa ti ulih ngalah ka dunya? Semina orang ti arap ka Yesus nya Anak Allah Taala” (1 John 4:4; 5:4,5). Pedana mega Kolosi 2:13,15.

b. Kuasa Merintah Sitan

Sepengudah pengangkat Iya ari pemat. “Iya ti udah niki ke serega lalu duduk muak ari kanan Allah Taala, merintah semua melikat enggau bala kuasa ti merintah enggau bala antu Sitan” (1 Pet. 3:22). Pedana mega ba Luk. 10:17-19.

c. Pengering Ngelaban Akal Sitan

“Aku minta, awak ka ati kita tau terbuka lalu meda penampak Iya, ngambi ka kita nemu, nama pengadang nya kebuah iya udah ngangau ka kita. Lalu nemu pengeraja mulia pesaka sida ti anembiak iya, lalu baka nya mega pemesai kuasa iya ti endang kering ba kitai ti arap. Kuasa iya ti dalam kitai, sebaka enggau pengering kuasa ti dikena iya lebu iya ngangkat ka Kristus ari mati, lalu nuduk ka Iya muak ari kanan iya di serega. Kristus merintah di endur nya ari atas semua pemerintah bala antu enggau rajah ti merintah; iya ari atas semua orang ti bepangkat besai enggau ti bekuasa di dunya tu enggau di dunya ti deka datai”

“Allah Taala ngasuh semua utai ari baruh kaki Kristus, lalu netap ka iya nyadi Tuhan semua utai ketegal Eklisia. Eklisia nya tubuh Kristus ti menuh ka iya, lalu iya menuh ka semua utai di sebarang endur” (Epe. 1:18-23). Pedana mega ba Mrk 16:15-18; SPKR 1:8 enggau 4:33.

5. Awakka Kitai Nyadi Anak Lalu Bempu Perintah Serega

“Laban Roh Kudus ti udah diberi Allah Taala ngagai kita, ukai ngasuh ati kita nyadi baka ulun ti takut; tang Roh Kudus nya ngasuh kita nyadi anak iru Allah Taala, lalu ulih kuasa Roh Kudus kitai ngangau ngagai Allah Taala, ‘Apai! Apai aku!’ Roh Allah Taala besaum enggau ati kitai, nentu ka kitai anak Allaha Taala. Nyadi laban kitai anak iya, kitai deka bempu pesaka ti diberi iya ka anembiak iya, lalu kitai mega deka bempu sama enggau Kristus utai ti udah ditaga Allah Taala ka iya; laban enti kitai sama nat ka pemerinsa enggau Kristus, kitai mega deka sama enggau bempu mulia iya” (Rm 8:15-17).

B. PENGANGKAT IYA ARI MATI

1. Utai Tu Ianya Pengelepas Ari Pengidup Dulu Suba

Pengidup kitai dulu suba ti bedosa di-anchur ka begulai enggau pemat. Yesus ba kayu regang, lalu dikubur begulai enggau Iya ba dalam lubang kubur. Udah nya, lebu Yesus diangkat ka, idup baru, kitai mega diangkat ka begulai enggau Iya nyadi mensia baru ninggal ka semua idup ti lama ba kubur Yesus!

“Nya alai ulih baptisa, kitai dikubur enggau Iya sereta besaum dalam pemat. Iya, ngambi ka kitai baka Kristus ti udah di-angkat ka ari mati ulih kuasa Apai ti bemulia, baka nya mega kitai tau idup dalam pengidup baru.

Enti kitai udah besaum enggau Iya dalam pemat, baka nya mega kitai deka besaum enggau Iya, lebu kitai di-angkat ka idup baru ari mati, baka iya. Lalu kitai nemu tu: pendiau kitai ti dulu udah diregang begulai enggau Kristus, awak ka tubuh kitai ti diperintah gaya pengidup mensia ti bedosa ari asal tau dirusak, ngambi ka kitai enda agi nyadi ka ulun dosa. Laban lebu kitai mati, iya dilepas ka ari kuasa dosa. Enti kitai udah mati besaum enggau Kristus, kitai mega arap ka diri ulih hidup begulai enggau Iya. Laban

kitai nemu, enti Kristus udah di-angkat ka idup baru ari mati lalu enda tau mati agi-reti nya pematid nadai agi kuasa atas iya. Pematid iya nya pematid ka dosa, sekali aja; lalu pengidup iya ti diatu, nya idup ka Allah Taala. Baka nya mega kita berunding ka diri empu, mati ka dosa, tang idup ka Allah Taala besaum enggau Jesus Kristus” (Rm 6:4-11). Peda mega ba Epesus 2:1-7 enggau ba Kolosi 2:12-15.

2. Utai Tu Ianya Pengering Kitai Maya Ka Diatu

Laban Tuhan Jesus Tuhan ti IDUP, kitai nerima pengering Roh Iya ba pengidup sereta menang ari atas dosa enggau semua serang Sitan ngagai kitai.

“Enti baka tu, kati ko kitai? Enti Tuhan setanah enggau kitai, sapa ulih ngelaban kitai? Iya enda sayau ka Anak Iya empu, tang Iya nyerah ka iya ketegal kitai semua! Iya meri kitai Anak iya-kati enda ka iya ulih pengasih iya, mega deka meri kitai semua utai?”

“Sapa ti deka besalah bala orang ti udah dipilih Allah Taala nyadi enggi Iya? Sapa orang ti tau nyalah sida? Jesus Kristus empu ti udah mati, ti lebih agi Iya udah diangkat idup baru, lalu diatu duduk sepiak kanan Allah Taala. Iya besampi ka Allah Taala ngari ka kitai!”

“Nya alai sapa ti ulih nyerara kitai ari pengerindu Kristus? Ulih penusah ngereja nya, tauka pemerinsa, tauka penemu ti nekan, tauka pengelapar, tauka penyeranta, tauka utai ti ngasuh bebadi, sekali ka pematid?”

“Munyi ko Bup Kudus; ‘Ketegal nuan kami nyau ka mati besahari-hari; kami digaga baka bedus ti nyau deka digayang.’ Enda pia, dalam semua utai tu, kitai udah bulih pemenang ulih iya ti rindu ka kitai!” (Rm 8:31-38).

3. Utai Tu Ianya Pengadang Ba Maya Ti Deka Datai

Pengangkat Jesus ari pematid meri kitai pengadang ti besai ba maya dudi ari ila. Iya ti disebut ‘Iya Anak tuai ti di-angkat ari mati’ (Kolosi 1:18). Ari pengangkat Jesus ari mati, iya muka jalai ka semua orang ti arap ngagai Iya awak ka ulih nitih ka iya – lalu diangkat ari pematid! Maya nya ila, Jesus Kristus deka datai baru ngagai dunya enda sebaka anak mit, tang madah ngagai pelusuk dunya sapa Iya ti bendar – Tuhan Bekuasa enggau Pemerintah utai ti udah digaga iya empu. Lebu Maya tu ila, semua utai ti udah mati, orang ti arap ngagai Iya, deka angkat idup baru!

“Lalu enti Kristus enda di-angkat ka ari mati, reti nya pengarang kita nadai reti lalu kita mengkang tesat dalam dosa. Reti nya mega, sida ti arap ka Kristus, tang udah mati, tentu sida lenyau. Enti pengadang kitai ka Kristus semina nyadi ka pengidup kitai di dunya tu aja, kitai tentu lebih agi tusah ari orang bukai dalam dunya tu.”

“Tang iya ti bendar, Kristus udah di-angkat ka ari pematid, nyadi ka buah bungas kena netap ka semua sida ti udah mati deka di-angkat ka idup baru”

“Baka pematid datai ari siko mensia, baka nya mega pengangkat ari mati datai ari siko mensia”

“Baka semua mensia ti enda tau enda mati ketegal kaul sida enggau Adam, baka nya mega semua deka di-angkat ka ari mati ketegal saum sida enggau Kristus. Tang genap iko deka di-angkat nitih ka riph: dulu ari semua nya Kristus ti buah bungas; lalu lebu Iya datai baru,

sida ti endang enggi Iya.” (1 Kor 15:17-23). Pada mega ba 1 Korint 15:50-57 enggau ba 1 Tesalonika 4:13-18.

KOMITMEN AKU

Laban pengangkat Jesus ari pematid udah mai pemenang ka aku, aku besemaya deka nerima enggau pengabis ati aku pengidup ti baru enggau pengelepas ti bisi dalam Jesus. Aku deka bepanggai rat ba pemendar nya lalu deka madah ka pemendar ti bisi dalam Jesus ngagai semua orang.